


# JUBILEJ 50. VOLUMENA (GODIŠTA) ČASOPISA (GEODETSKI) GLASNIK

## 1 UVOD

U Bosni i Hercegovini je, prema dostupnim podacima, *Udruženje geodeta* osnovano daleke 1919. godine. Smatra se da su geodeti još u vrijeme vladavine Austro-Ugarske monarhije na prostoru Bosne i Hercegovine imali svoje udruženje, međutim u momentu pisanja ovog teksta, zvanični podaci koji bi to potkrijepili nisu na raspolaganju. Nakon Drugog svjetskog rata *Udruženje geodeta* nastavlja s radom kao sekcija *Društva inženjera i tehničara Bosne i Hercegovine*, koja kasnije prerasta u *Savez geodetskih inženjera i geometara Socijalističke Republike Bosne i Hercegovine*, da bi današnji naziv bio *Savez udruženja građana geodetske struke u Bosni i Hercegovini*. Udruženje (kasnije Savez) bosanskohercegovačkih geodeta se u prvih pet decenija svog djelovanja oslanjalo na publikacije iz Hrvatske i Srbije, putem kojih je informisalo članstvo o svom radu, o stručnim i naučnim dostignućima itd. Obzirom da se dugo vremena osjećala potreba za vlastitim časopisom, u kojem bi se tretirala problematika geodetske struke u BiH, na *Plenumu Skupštine Saveza geodetskih inženjera i geometara Bosne i Hercegovine* održanom 10.12.1966. godine donosi se odluka o pokretanju takvog glasila. Prvi broj časopisa *Glasnik* iz štampe izlazi 1967. godine, a pod tim nazivom objavljivan je u naredne dvije decenije. Godine 1987. donesena je odluka da se časopis preimenuje u *Geodetski glasnik*, čime je naglašena njegova primarna orijentacija.

Od, ne tako daleke, 1967. godine pa do danas (kraj 2016. godine) prošlo je punih 5 decenija od kako je na bosanskohercegovačkom prostoru čitateljstvu dostupan časopis *Geodetski glasnik*.



Slika 1. Naslovne strane časopisa Glasnik/Geodetski glasnik, iz razdoblja 1967 - 2007.

## 2 IZGLED I SADRŽAJ ČASOPISA

Prvi broj časopisa koji obrađuje problematiku geodetske struke u Bosni i Hercegovini izašao je iz štampe 1967. godine. Glavni i odgovorni urednik časopisa bio je Muhamed Šestić, diplomirani inženjer geodezije.

Od prvog broja časopisa, nižu se brojevi jedan za drugim i tako već punih 50 godina. Iz finansijskih razloga i uslijed ratnih djelovanja časopis nije izlazio svake godine, pa je jubilarno 50. godišće časopisa vezano za 47 objavljenih brojeva *Geodetskog glasnika*.

Godine 1987. donesena je odluka da se časopis preimenuje u Geodetski glasnik, čime je naglašena njegova primarna orijentacija. 45. godišnjica izlazenja obilježena je 2011. godine, kada je predstavljen novi redizajnirani, sadržajno i grafički inovirani izgled časopisa, uz objavljivanje prvog elektronskog izdanja Geodetskog glasnika na internetu.

Godina 2011. je godina u kojoj je prvo elektronsko izdanje *Geodetskog glasnika* publikovano na internetu, a ubrzo nakon toga časopis se počinje uvrštavati u međunarodne baze podataka.



Slika 2. Naslovnice Geodetskog glasnika iz razdoblja 2011 - 2016. odražavaju raznolikost objavljenih priloga

*Geodetski glasnik* sadrži naučne i stručne članke vezane za geodetsku struku općenito, kroz objavljivanje radova iz oblasti kartografije, katastra zemljišta, itd.

Dešavanja na svjetskoj geodetskoj sceni su takođe sadržana u ovom jedinom naučnom bosanskohercegovačkom naučnom glasilu u kome su čitaoci informisani o konferencijama iz raznih oblasti geodezije, o naučnim skupovima koji tretiraju pojedine uže naučne oblasti geodezije.

Životno teška rubrika časopisa *In memoriam*, sadrži sjećanja na kolege koji više nisu među živima, ali se uspomena na njih čuva i ostat će trajno zapisana u *Geodetskom glasniku*.

Tabela 1


Izdati brojevi časopisa razvrstani po godinama izdavanja

<b>Broj</b>	<b>Godina izdanja</b>	<b>Broj</b>	<b>Godina izdanja</b>
<b>Geodetski glasnik 47</b>	2016	Glasnik 23	1986
<b>Geodetski glasnik 46</b>	2015	Glasnik 22	1985
<b>Geodetski glasnik 45</b>	2014	Glasnik 21	1983
<b>Geodetski glasnik 44</b>	2013	Glasnik 20	1983
<b>Geodetski glasnik 43</b>	2012	Glasnik 19	1981
<b>Geodetski glasnik 42</b>	2012	Glasnik 18	1979
<b>Geodetski glasnik 41</b>	2011	Glasnik 17	1978
<b>Geodetski glasnik 40</b>	2011	Glasnik 16	1977
<b>Geodetski glasnik 39</b>	2007	Glasnik 15	1977
<b>Geodetski glasnik 38</b>	2005	Glasnik 14	1976
<b>Geodetski glasnik 37</b>	2003	Glasnik 13	1975
<b>Geodetski glasnik 36</b>	2002	Glasnik 12	1974
<b>Geodetski glasnik 35</b>	2001	Glasnik 11	1974
<b>Geodetski glasnik 34</b>	2000	Glasnik 10	1973
<b>Geodetski glasnik 33</b>	1999	Glasnik 9	1972
<b>Geodetski glasnik 32</b>	1998	Glasnik 8	1971
<b>Geodetski glasnik 31</b>	1996	Glasnik 7	1970
<b>Geodetski glasnik 30</b>	1994	Glasnik 6	1970
<b>Geodetski glasnik 29</b>	1991	Glasnik 5	1969
<b>Geodetski glasnik 28</b>	1990	Glasnik 4	1968
<b>Geodetski glasnik 27</b>	1989	Glasnik 3	1968
<b>Geodetski glasnik 26</b>	1988	Glasnik 2	1967
<b>Geodetski glasnik 25</b>	1987	Glasnik 1	1967
<b>Geodetski glasnik 24</b>	1987		


### 3 UREDNICI I SARADNICI ČASOPISA

Kvalitet *Geodetskog glasnika* u međunarodnim krugovima svakodnevno raste, što je zasluga glavnog urednika koji zajedno sa saradnicima, tehničkim urednicima, recenzentima i autorima članaka ulaže velike napore za boljitak časopisa, a sve u bliskoj saradnji sa predsjednikom *Saveza udruženja građana geodetske struke u Bosni i Hercegovini*.


Ovih pet decenija izdavanja časopisa obilježilo je nekoliko zvučnih geodetskih imena na mjestu glavnog i odgovornog urednika časopisa. U nastavku su prikazani glavni i odgovorni urednici časopisa i razdoblja u kojima su obavljali/obavljaju uredničku funkciju.



Muhamed Šestić, dipl.inž.geod.  
1967 – 1982.



Prof.dr.sc. Smail Pašalić, dipl.inž.geod.  
1983 – 1998.



Prof.dr.sc. Nihad Kapetanović, dipl.inž.geod.  
1999 – 2003.



Doc.dr.sc. Medžida Mulić, dipl.inž.geod.  
2005 – danas

*Jusuf Topoljak*  
*Admir Mulahusić*